



Kristus oye onakuyiwa yoshigwana

Sebulon Ekandjo

ONKALO YOPAPOLOTIKA MEVI NDIKA SHO INAAIYI UKA NATANGO KUUWANAWA, OTASHI MONIKA SHA FA KWAA NA NANDO ONAKUYIWA YASHA.

“The Ongeleki yaKristus kayi na okukala monkalamwenyo yaa na etegameno, oshoka Kristus oye etegameno lyetu,” osho oshigongi shaayehe shOraata yoongeleki muNamibia (CCN) sha pulakene ehokololo lyokomumvo ndyoka sha leshelwa kuAmushanga Ndjayi gwehangano ndyoka, omusita Abisai Shejavalu.

Omutumba gwoshigongi shoka ogwa li ko petameko lyaFebuluali moka gwa hogololulula omumbisofi James Kauluma gwaAngilikana a kale natango omupresidende gwehangano omimvo mbali tadhi landula.

Omuwilikingeleki Hendrik Fredrik, gwOngeleki onkwaevangeli, paLuther yaAaluudhe mUushimba (ELC) okwa ningi omupresidende gwopevi nomusita Matti Amadhila, omukwathi gwomumbisofi mu ELC - ELOC, oye a hogololwa a ninge omupeha gwaFredrik uuna kee po.

Momapandja 13 gehokololo, Amushanga Shejavalu okwa gandja uyelele pafupi waashono sha kala shi ipyakidhi-lwa nasho kOraata okuza Januali 1984

sigo Januali 1985.

Mehokololo otamu holoka wo omathaneke gaashono sha dhiladhilwa shi ningwe po natango momimvo tadhi landula.

“Aawiliki yiikandjo yi ili noyi ili sho nayo wo taa ka gandja omahokololo giilonga yawo, osho sha fala ndje mpoka ndi igameke ashike kokuhokolola iilonga yakwalukele, kakele shila kiilonga yiikandjo mbyoka yi li mewiliko lyandje,” osho dr Shejavalu a tumbula mefalomo lyehokololo lye.

Oku na nale mehangano ndyoka iikandjo konyala ihetatu nuukomitiye konyala 11, inaamu kwatelelwa Ewilikongundu.

Miikandjo mbyoka omwa kwatelelwa ngaashi uuhamushanga, moka Shejavalu e li omukuluntu, iimaliwa, eputudho moosikola, ependulopo lyoshigwana, uudiakoni, uuteologi, elongo lyOshiiingilisa noshomakwatathano gopainyolwa noongodhi.

Mehokololo omwa holoka wo ompumbwe yiikandjo iipe ndjoka ya dhimbululwa ngaashi oshikandjo shaagundjuka noshakiintu, oshowo aasita yaali yokulonga mokati kaanasikola.

Kombinga yelongo lyOshiiingilisa, ehokololo olya ti oku na ngashingeyi omahala 25 ga dhikwa koombinga noombinga dhoshilongo, moka mu na aalo

ngwa 174, naalongi 46 omumvo 1984. Ihe nuumvo aalongi oyi indjipala sigo 60.

Tala kep. 2



Omumbisofi James Amupanda Kauluma, omupresidende gwOraata yOngeleki muNamibia (CCN) okuza 1978 sho ya totwa.

Dha za kep. 1

Moshikandjo shuudiakoni, moka mwa kwatelelwa uulinawa wopankalathano osho shimwe ngiika shomiikandjo ii-shona mehanganu ndyoka, ya fa inaayi tsakanekwa komikundu odhindji miilonga yayo.

“Aantu oyendji mOvenduka nopondje oya mono uuwanawa musho,” osho ehokololo lya ti.

Mombelewa ndjoka aantu oya pewa iikwatha yopalutu ngaashi iikulya nokombinga onkwawo, aantu oya longwa noya putudhwa nkene ye na okwiikwatha yo yene.

“Inatu hala tu tote po moprojeke ndjika onkalo moka aantu taa dheulilwa okuhehela, aawe,” osho omuhokololi a londodha.

Okuya koshitsa sheputudho lyoosikola omuhokololi okwa ukilile miinima mbyoka pethimbo ndika tayi ehameke oyendji, unene mboka ye na ko nasha nonakuyiwa yevi ndika.

Miinima mbyoka omwa kwatelelwa omwaalu omunene moshilongo gwaalongi inaagu mona natango elongo lyopombanda, osho wo aagundjuka aailongi oyendji kaaye na ontseyo miilongwa yoScience noMathematic, iilongwa mbyoka ayike hayi egulula ompito yomuntu a vule okukonakona iitopolwa mbyoka ya simana ngaashi uutekinika.

Oshikandjo shika oshi li po okukandula po omikundu dhimwe ndhoka, nomakwatho gopaimaliwa ngoka tashi gandja okwiihumitha komeho, nenge okulonga aantu iilongwa mbyoka.

Moshikandjo shependulo po lyoshigwana, ehokololo olya tumbula ooprojeke konyala 10, tadhilongwa muumbugantu woshilongo.

Ooprojeke ndhoka odha kwatelela mo oosikola ndatu dhi na aalongwa ayehe kumwe 652 naalongi 38 pomahala; Hoachanas, Gibeon nomuVaalgras. Oku na wo omapya gatatu taga longwa, ooprojeke mbali dhehondjo, ongalashe mumwe noshihongelo, osho wo okasitola kaakulupe moka taa vulu okulanda pankondo dhomalunza guumaliwa wawo.

Osikola onene mooprojeke ndhoka oyo muGibeon ndjoka ya tameka na Sub A sigo Ositanda VIII yi na aalongwa 400. Aalongwa yamwe ohaa zi momuhandjo.

Osikola onshonalela oyomuVaalgras ya tameka no Sub A sigo Ositanda 4.

Ehokololo olyu ulike wo omikundu dhi ili nodhi ili, dhi li ooprojeke ndhoka moshipala, mudhimwe kape na we nokuli etegameno lyokutsikila ngele itapu ningwa eopaleko mbala.

Kombinga yaalongwa okwa hokololwa uudhigu wawo wokutaambwa koosikola dhilwe dhepangelo uuna ya mana ko oongundu dhawo mpoka ya tameke.

Ooprojeke oonkwawo kiitopolwa yilwe yoshilongo ngaashi kOwambo, ngiika nopalwe odhi li wo momathaneko nkene tadhilongwa tamekwa.

Oraata yOongeleki muNamibia oya totelwe 1978. Ngashingeyi oyi na oongelekishilyo 8, dhi na iilyo ayihe kumwe konyala 1,000,000.

Ehokololo, Amushanga Shejavali okwe li hulitha nokuulika konkalo yoshilongo ndjoka tayi kanitha etegameno, unene mokati kaagundjuka nokwa hiya oongeleki dhi tskile natango nokuyambidhidha omadhiladhilo goshitokolitho 435 shligwanahanganu.

“Manga tatu tegelele ihe oshitokolitho shoka shi tulwe miilonga, Oongeleki ya Kristus muNamibia, oyi na okukala ya gama aluhe kombinga yaahepekwa,” osho a kumagidha iilyo yomutumba gwOraata mehokololo lye.



Efola Nora Chase, omuwiliki gwoshikandjo sheputudho moosikola mOraata yaNamibia.



Amushanga gwOraata yOongeleki, Abisai Shejavali

Shiimba oho diladila, kutya owa tokelwa okulimbeselela oshifo shoye neudo? To kundanenwa kuvakweni, endelela u tume edina loye noshimaliwa, oto ka tambula oifo yoye 24 Maalitsa 1985 fiyo Maalitsa 1986.

OMUMVO GWAAGUNDJUKA

Dha za kep. 4

opo mugwo aantu ya dhiladhile omukalo gwokukonakona epipi egundjuka nkene lya tya moshilongo kehe muuyuni auhe.

Omumvo ogwa uthwa wo ku ningwe ompangela nooprograma dhethimbo ele ndhoka tadhilalakanene okuyamukula omapulo gaagundjuka.

Omumvo gwaagundjuka kagu shi omumvo gwaanona, moka aakuluntu taa pulwa ando ya ningile sha aanona, aawe.

Omumvo gwaagundjuka omumvo moka aagundjuka taa pewa notaa'indilwa ya taambe oompito ya ninge sha, yi iningile yo yene.

Ope na etegameno ano kutya aagundjuka otaa pendulilwa ohokwe nehalo notayi kothwa yi itule mo miitopolwa ayihe nayi kale opaekonomi, papolotika, pankalathano, nopahedhi dhoshigwana.

(Education News)

KALUNGA E YA OKUTALA AANTU YE

Lukas 1:39-45:



Maria naElizabeth oyo aantu taa tumbulwa moohapu ndhika. Oyo aantu namumwayina. Inaa kala peha limwe. Maria okwa kala kuGalilea moshilando shaNasareth naElizabeth okwa kala kuJudea momukunda gwaSilo, moka mwa li aasaseri.

Elizabeth oye omukulukadhi gwomusaseri Sakaria. Pethimbo ndika Sakaria okwa li a thita elaka sho a lombwelwa komuyengeli, kutya ota pewa omumati, oshinima shika osha nyenge Sakaria oku shi itaala.

Nando ye ini itaala, Elizabeth okwa ningi omusimba pahapu dhOmuwa. Maria wo okwa pewa elaka lyOmuwa ota ningi yina yOmuhupithi guuyuni. Otatu mono mpano shono, Omuwa Kalunga e shi longekidhile aantu, osha thikana okugwanithwa. Kalunga e ya okutala aantu ye.

ETHIMBO LYAKALUNGA OLYA THIKANA:

Oohapu dhetu odha tameke netumbulo: Pomasiku ngeyaka. Shino otashi ti tango; Pomasiku ngeyaka nethimbo ndyoka otandi tutumithile David oshitutuma, shashili, noshilongo she ota kala noku shi pangelitha oshili yo yene nuuyuki Jer. 33:15. Omuwa Kalunga okwa tameke oshilonga she mungoka omuntimbe nomukulupe.

Kalunga okwa tameke oshilonga she mokakadhona nkona taka ti; "shino otashi ningwa ngiini, oshoka omulumentu kandi mu shi." Pomasiku ngeyaka, otashi ti ano pomasiku giiningwanima tayi kumitha, Kalunga ta longo momuntu. Kalunga ta longitha omuntu moshinima shehupitho lyomuntu.

Elizabeth oti imwenene megumbo a kumwa shoka she mu ningilwa, ye ita vulu oku shi kundathana nomusamane gwe, oshoka elaka olya thita. Maria okwa mwena niikumitha ya ningwa muye. Otashi holola muNasareth omwa fa kamwa li omukadhona omukwawo ngoka taa vulu okukundathana naye iinima mbika iinene.

Okwa tokola okuza muNasareth noku ya kuJudea kuElizabeth ya ka kundathane iinima mbika iinene, oshoka sigo opethimbo ndyoka eitaalo lyaMaria inali koka manga okutaamba, ashihe tashi

ningwa molutu nomwenyo gwe. Ota pumbwa ngoka taa kundathana naye iinima iinene yesilohenda lyaKalunga.

Nando tatu mono esilohenda lyaKalunga lye tu hololelwa otatu pumbwa omukwetu tu kundathane naye, nena eitaalo lyetu otali koko okutaamba iilonga iinene tayi longwa kuKalunga mutse.

Otatu dhiladhila olwindji, shino osho oshinima sha vulu okuningilwa Maria naElizabeth ayeke, ihe osho oshinima tashi vulu okuningilwa kehe ngoka, oshoka osho Kalunga te ya muuntu womuntu nehupitho. Omuwa ota longo iikumitha moomwenyo nomomalutu getu. Oye ita kongo ashike aantu namumwayina, Maria naElizabeth, ihe ota kongo ezimo alihe lyaalunde. "Oto mu luku Jesus, oshoka oye ota hupitha oshigwana she moondjo dhasho." Mat. 21.

OOMWENYO DHUUDHA TADHI FULUKA

Maria okwa yi nokweendelela kuElizabeth. Ondjila nando onde omolwenyanu lyuudha omwenyo gwe, ondjila oya fa ya ningi ofupi. Okwa thiki megumbo lyaSakaria. Jesus okwa lombwele aalongwa ye, ngele tamu yi megumbo li kundeni.

Osho omukalo gwawo okutya: Ombili nayi kale megumbo ndika. Aanegumbo notaa yamukula. Ekundo lyaMaria olya inyengitha omwenyo gwaElizabeth, inali inyengitha ashike oomwenyo, ihe olya inyengitha wo okanona mela lya-yina. Einyengo lyokanona haka olyo einyengo lyenyanyu, inaali fa ndyoka lya ningilwe mela lyaRebekka, uunona sho wa kondjo mela lyayina. 1Mos.25:22.

Shoka tashi gumu yina otashi gumu wo okanona ke li mela lye. Ngele enyanyu nenge oluhodhi. Okanona oka nuka mela lyaElizabeth kenyanu. Pethimbo ndyoka opwa ningwa egwanitho lyaashoka sha uvanekwa nale: Johannes otu udha Ombepo Ondjapuki, ov.41,

nokwa longithwa kuyo.

Maria okwa adhikwa a lombwelwa komuyengeli: "Ombepo Ondjapuki otayi ku lambele, noonkondo dhaanguka gwokombandambanda otadhi ku siikile," ov.35. Ombepo Ondjapuki oya kulukile maantu. Oomboka Omuwa te ya longitha ote ya zaleke noonkondo dhOmbepo Ondjapuki, ya vule okulonga koonkondo dhOmbepo Ondjapuki. Omuwa okwa hala oku tu udhitha nOmbepo Ondjapuki nena.

Ombepo Ondjapuki otayi kulukile mutse nena. Oongoka u udhithwa Ombepo Ondjapuki ota tameke okuprofeta, ngaashi Elizabeth.

Maria ina hokololela natango Elizabeth iikumitha mbyoka a mono. Ombepo Ondjapuki oya hololele shoka shuudha momwenyo gwaMaria. Elizabeth okwa popi, ov.42,43. Elizabeth okwa kuminwa yina yOmuwa gwe e ya kuye.



Tse hayina a thiki kutse, ihe Jesus ye mwene e ya kutse. Ngoka e na okukumwa unene oElizabeth nenge otse? Oya tameke ihe okukundathana Omuwa a longo muMaria kuNasareth naElizabeth ota popi shoka Omuwa a longo megumbo lyawo muJudea. Oomwenyo dhawo otadhi tsu kumwe: Eeno, Omuwa okwe tu ningile iinima iinene otse notwe shi nyanyukilwa. Ps.126:3. Uuna tu udha iikwavi moomwenyo dhetu otatu kundathana iinima mbyoka nuuna tu udha iikwambepo, otatu kundathana iikwambepo. Ihe olwindji omaluhodhi gaashoka tashi ningwa po otaga talitha iipala yetu pevi ngaashi oonakweenda ondjila yokuEmaus. Moonkundathana dhaElizabeth naMaria eitaalo lyaMaria olya koko okutaamba iinima iinene mbyoka Omuwa te yi longo muye.

ELAGO NDIKA OLYAAMBOKA YI ITAALA

Pethimbo ndyoka Maria naElizabeth taa nyanyukwa mOmbepo Ondjapuki,

Tala kep. 9

ONKALO YONDJOKANA MOMATHANO



ESO

Omumvo gwaagundjuka moongeleki oonkwaLuther



Omupangi Hanna (Hosea) Katau, okwa hulitha oondjenda dhe ombaadhilila 3.2.1985 moshipangelo shaNandjokwe mepipi lyoomvula 64.

Meme Hanna okwa kala omukalele gwomutumwa Eevi Helminen muElim manga inaa tameka osikola yuupangi.

Sho a-piti mosikola okwa ka longa kEngela, mOnandjokwe, nopethimbo limwe okwa ka yakula kOkavango nokugalukila ishewe mOnandjokwe.

Ngashingeyi okwa adhikwa a yi moshipundi shevululuko. Okwa thigi ko omusamane gwe noyana yane.

Omumvo gwaagundjuka ogwa kundathanenwe mOshigongi oshinene shAakwaluther ayehe muuyuni muBudapest omumvo gwa yi.

Aagundjuka ya zile miilongo ayihe moka mu na Aakwaluther, oya li ya gongala moshigongi shawo shono sha tetekelele omutumba gwaayehe omuthiyali gwehangano ndyoka.

Osho wo omutumba gwaayehe sho gwa thikana okugongala, ogwa hogolola natango okakomitiye kokukonakona iinima yi na sha naagundjuka.

MOngeleki ya ELC - (ELOC) omugundjuka Anna Mweshida, oye kwa li a kalele po aagundjuka ayehe ya ELOC, moshigongi shaagundjuka mbeyaka.

Omathaneko ngoka ga zile muungundu mboka uyali; a) kaagundjuka ya kalele po Oongeleki dhawo; b) nokakomitiye ka hogololwa momutumba gwaayehe, oga li ga kundathanwa momutumba ngoka.

Omathaneko oga li ga kwatelela mo iitsa tayi landula:

1. Oshipalanyolo: "Eitulomo, ependulopo nombili", ngaashi sha thanekelwa omumvo gwaagundjuka, kligwanahangano, shi taambwe ko wo nomOongeleki adhihe dhEhangano lyAakwaluther.

2. Oshikandjo shaagundjuka mOngongahangano yAakwaluther shi longekidhe oo-

mbapila moka mwa shangwa ootundimbibeli heyali, dho dhi tuminwe aagundjuka kombinga adhihe dhuuyuni oku dhi kundathana melala lyomasiku goshiwike shimwe.

3. Uule womumvo aguhe, aagundjuka momagongalo ya kwathe momalongelokalunga okuninga sha, ye shi ninge Osoondaha ontintatu kehe yomwedhi.

4. Oongelekishilyo mOngongahangano yAakwaluther dhi itule mo momikundu dhi na sha naagundjuka, go Omalelongeleki ga kundathane omikundu ndhoka.

5. Oshikandjo shaagundjuka mOngongahangano yAakwaluther shi longekidhile aagundjuka ayehe iigongi muule womumvo aguhe.

6. Iigongi yaagundjuka mOongeleki adhihe, yi tumine ooprograma dhayo oshikandjo shaagundjuka kOngongahangano yAakwaluther.

Omolvashike kwa ningwa omumvo gwaagundjuka?

Omumvo gwaagundjuka muuyuni auhe ogu uthwa kEhangano lyIlgwanahangano

Tala kep. 2

OMULONGA: SHOKA TWA PUMBWA OMAKWATHO KOOKUUME

Ongulangula potundi 8.00, omusita Eino Johannes Gweendama, ota konkola nale pombelewa yOmukwetu, pOniipa. Oye mwene e ya, ina tuma ko. Manga tatu minike, ye ota kuthile ndje ko manga iitya itano mOshiingilisa, tayi nuka kondungu yelaka lyomusamane gwomimvo dhi li ko-60.

Ondi ilongo mbala, kutya nani ina thigala momidhingoloko dhomasiku gawo gonale, ihe okweende pamwe nethimbo noina kanithila mo nando shoka shi na oshilonga.

Okwi indile ndje ndi ka tale etungo lyongeleka yawo ndyoka yi ipyakidhila nalyo omasiku ngaka, opo ndi tale aniwa shono te vulu okulombwela aaleshi yandje, yo ya kwathe naashoka ye na moshilonga shoka.

Mondjila yetu okuya kOmulonga, ngiika ookilometa omulongo, ohaluka Gweendama okwa tete pokati oonkundathana dhetu ombaadhilila. Okwa peguuka mo mondjila, ndi mone a thikama pokandama komeya.

Moshihauto okwa nuka mo ngaashi omumati gwomimvo 25, okwa petama kashona nokwa hili ko omunino kohi yoshihauto, nani okwa hala okuteka omeya.

Omukulukadhi gumwe a adhika ta longo mepya, nani e mu mono okwe ekele okatemo ke mpeyaka, e ta zi ko a tota e ye okukwatha. Oondoloma mbali dhu udhithwa omeya gokulonga etungo lyongeleka notwa tsikile ondjila yetu.


Onda dhimbulula kutya poompito odhindji, omusamane ngoka okwa kanitha ootundi dhokumakela sha, ngele pomulongo ongula nenge omwiha pomutenya, omolweipyakidhilo enene. 'Kehe kamwe omungoye taka pulwa, uuna waa po, aantu oya mwena tuu.'



Petrus Abiatar, Okaku, ota monika methano ndika ta kolonga ekuma noshipilangi shoka oshile.

nonda yelelwa nale kutya omukulupe gwomimvo 25 mewiliko lyegongalo, pamwe nelelo lyomukunda, okwiilongo mo oowino odhindji.

Pamathimbo nomathimbo komilungu dhe ohaku inyenge iitya yepandulo omolwaa mboka ye mu kwatha moshilonga shetungo ndyoka kaali shi epu pethimbo ndika, ngaashi omusamane Johannes Mbokoma nenge omusamane Nangolo dhaJacob.



Methano ndika, omusamane Kakololo ota taamba oshipeleki pombanda, te shi pewa kaamati ye pevi, muJanuali 1985. Ondhopi yotango komukanka oya tulilwe ko muApilili 1984.

"Ekandjo," osho i ithana ndje newi lya kola a hololele ndje, kutya shono a hala okulombwela ndje kashi shi we omuhapo gowala "Aantu mbo, shimpa tuu waa li nayo, nando ou kale u na oonkondo dhi thike peni, ito eta po sha."

Omatumbulo ge oga fala ndje komukulukadhi twa zi puye a kwatha metekelo lyoondoloma,

Mokutsikila nondjila yetu, oonkundathana dhetu odha ningi mpo dhi ipumu ketungo lyongeleka, mpo dha yi kiinima yeledo lyegongalo, sigo twa thiki. Kokulelela iipeleki otayi monika ketungo ndika tayi adhima pehala ndiyaka, Oshilulu, lya pingene ndyoka lya dhikilwe egongalo lyotangotango Omulonga, mpoka aakriste yotango yahamano ya shashelwe omumvo 1883.

Omusamane Kakololo klitope, opo twe mu adha nosipana ye yi ipyakidhila nokudhengela ko oshipeleki sha hugunina, manga yamwe taa kolonga ekuma. Uunona wosikola mboka nawo owa fa ne ngaa wa hilwa ketungo ndyoka tali iholola olupe lwalyo lwongeleka, otau monika we ya okuthikamena mpoka nokutala.

Kuku Gweendama, okwa wilika omatungo ogendji moshilonga she shuusita, ngiika kombinga yongeleka, ndika olyo etiyali. Pamwe naakwanegongalo 1,600 mboka ya kolekwa, noyi inekelelwa okuholola po etungo ndika, otaa hiya, kutya oye na ondjila onde natango okuthika kethikilo. Kehe gumwe oto vulu oku ya yambidhidha nomukalo ngoka to vulu.


Sebulon Ekandjo

ESHIIVIFO

Natango dimbulukifa tuu mukweni opo e li mbesitelele oshifo shaye shOmukwetu 1985. Omhito opo i li.

Elongo mUukwaluudhi olya tulwa monomola yotango

Aalongi ye thike konyala 100 ayehe yomoshilongo shUukwaluudhi oya gongalele mOseko yaMwaala ya kundathane omikalo dhelongo moosikola dhawo nuumvo.



Omutalelishikandjo S. Kamati nomupeha omunashipundi gwoshigongi Teofilus Nekamba, kolumoho taa kundathana nkene oshigongi shi na okutsikila.

Oshigongi osha li ko petameko lyaFebuluali mewiliko lyomutalelishikandjo shoka omusamane Severus Kamati.

Elongo, noondjila dhokulonga iilongwa yi ili noyi ili, odha li dha dheulwa pethimbo ndyoka lyomasiku gatatu goshigongi.

“Aalongi yamwe aape, opo ya piti, onkene oya pumbwa okutala tango iiholelwa kaalongi aakulu nkene haa piti miinima iidhigu tayi ya tsakaneke”, osho omutalelishikandjo a hokololela OMUKWETU elalakano lyoshigongi.

Oshikandjo shaalongi yomUukwaluudhi, oshiti 11 palandulathano lyoshikondo shelongo mOwambo. Eputudho lyomoosikola moshilongo shoka shaNambula yaMukatha, otashi talelwa muuyeleele wevaangeli sho lya thikithwa mo kaatumwa konima yomimvo 75.

Nonando inashi kala oshipu petameko ondilo yelongo yi uvike ko noyi taambwe ko moshigwana, pethimbo ndika uukwatya mboka owa ninga ashike ehupu lyopahistoli.

Pauyeleele mboka wa zi mehokololo lyokomumvo lyomutalelishikandjo, okwa li aalongwa 6,594 moosikola dhopevi omu-

mvo 1984 ye na aalongi 156 naalongwa 936 mOseko ye na aalongi 27 omumvo tuu ngoka.

Eindjipalo ndyoka lyaanona moosikola dhopevi oopelesenda 10,7% (639) manga eindjipalo lyaalongi lya kala 13,9% (19)

okuyeleka nomiyalu dhomumvo 1983.

Shoka osho wo sha ningwa nokaailongi yomOoseko moshilongo shoka. Oopelesenda 25.5% (19), kombinga yaalongi oopelesenda 17.4 (4)

“Eindjipalo ndyoka oli li ko omumvo kehe nokatu shiwo manga shono tu na okuninga po,” osho omunashilonga ngoka gwomimvo mbali adhike miilonga mbyoka, Kamati a hokololele aalongi ye.

Eindjipalo lyaalongwa otali fala mompumbwe yomahala. Nonando omumvo nguka 1985 oshikandjo shoka oshu uvanelwa shi tungilwe omala gosikola 12, ompumbwe yomala 41, otayi thigala po natango inayyi yamukulwa.

Okuza 1984 okwa kala ashike omala gosikola 121 ngoka ga longekidhwa koshikondo shelongo, nomala gane ge li momatungo omakulu gegongalo, osho wo omatsali 49.

“Ope na lela okuningwa sha mpaka, kutya ihe oshike, walyewo,” osho Kamati a holola mokutongolola oompumbwe dhi na sha nelongo moshikandjo she.

Omutaleli Kamati okwa kala omulongi mOseko yaNgandjera, manga inaa langekwa muuhamushanga woosikola 1979-1982. Omumvo 1983 okwa langekwa ihe moshilonga shelelo lyaalongi konyala 180.

Oye oKamati kowala medhina, ihe moshinima shokutala oompumbwe dshoshigwana she, oku li omumati.

Sebulon Ekandjo



Moshigongi shaalongi yomUukwaluudhi 8 - 10.2.1985.

Etulumuko okudja koshilonga shoufitangobe fiyo okoufita wovanhu

Omukahambo, omukalele wovahongi, omuyevangeliste nomufitaongalo mEenhana, Johannes (Mukede woKonakalunga), okwa lekela eongalo lambulavo, 24.2.1985, kutya ye a fuda po manga keviyauko lomeongalo olo e li ninga oule weedula di dule 20.

Johannes omona watate Hangula (Jakob) Kashihakumwa nameme Vanyenga (Maria) Haufiku, cedalele domOputu (Angola), okwa dile mofuka kohambo yeengobe ndee te uya pokalelele wovahongi mEenhana.

Okwa ninga po omudo umwe auke, ye ota tameke ofikola yovamati mEngela 1935-1940. Pefimbo eli omumati weedula 22 e li naanaa mefimbo lokuninga eemhangela nomatokola a pama, oshilumenhu.

Otashi dulika oshinima eshi osho sha li she mu undula, e litule meefuka dile nodidjuu, dondjila yaNakamwandi oyo hai endwa kolupadi eekilometa di dule 900, okupitila moKavango, Caprivi fiyo Botswana a ka konge oilonga kOdjoni (Johannesburg).

Mondjila ei okwe liholola omulumenhu, tete palutu eshi a kala ofolomana yondjila fiyo okoilonga, nopativali pamhepo, eshi a kala omuhongi wavakwao mosheendo fiyo okoilonga.

Konima yedingonoko lile longhalamwenyo yaye okulikongela eemhumbwe, Kalunga okwe mu ifana meyakulo loufita nokwe mu pa emwenyo di dulife po 6000 melelo laye. Okwa kala ta tauluka eefuka nomalondo moushilo waUkwanyama a londa konghambe yaye ile okolupadi eshi ta shiike emwenyo odo.

Oshilonga eshi okwe shi yapulilwa 1959 mEngela. Omubishofi K.Dumeni, ou a kala yo moshivilo shetambulo loshipundi shetulumuko, oye kwa li umwe wovayapulilwa oshilonga fiku olo, pamwe naKashihakumwa.

Xe younona 16, Johannes, omushamane wofika ya ya pombada, woshipombo sholutu. Ombili yaye ohai konekwa unene meendjovo daye keshe tuu opo e li, ovanhu ohava kukuta ashike koindjola.

Konima yeedula daye deyakulo mu ELOC di dule paife 25, omufita ou okwa yandja eyakulo leongalo nomwenyo muwa momake omunyashalela, **A. Hashikutuva**, opo a tulumukife po omakipa aye neenumba domido 67, ye ta li oshikuvila shaye shetulumuko.


“Kalunga na pewe epandulo eshi a enda pamwe naame okudja mounona wange, koilonga okomake fiyo omwai yopamhepo.

“Edina lOmwe nali fimanekwe”, osho ye mwene te shi hepaulula, eshi ta tale onakudiwa yaye.

Sebulon Ekandjo

Ngenge wa shangela koshifo eshi, ndele ino hala edina loye li kale la shiivika kovalessi, tu hololela tete kutya oove lyelye nedina eli wa hala li holoke poshinyolwa olini.

Methano pevi, Johannes Kashihakumwa, kolumoho taa kundathana nomusita omukwawo Moses Shikongo.



Omufitaongalo Adolf Hashikutuva, mefano eli okwa nagekwa meongalo laEenhana, a ninga omufita omuwiliki. Enangeko ola ningwa komumbisofi K. Dumeni 24.2.1985, fiku Kashihakumwa a ya moshipundi shetulumuko.



PURA KWAMUKWE- NI OMU WA FANA UKARO WOGE

Esanseko eli kwa horokere moAngola. Momukunda gwaKazumba konontere domukuro gwaKwitu, kwa kere embo lyomuswamane Kanzongo ogu ga kere namunendi gedina lyaKambwanga. Kambwanga kwa kere mumati gornunongo, nga kwafa unene vakwawo mwanainye. Nage nga danauka, nga lisa nongombe, nga rovere, nga sana nokurugana yimwe hena yovamati.

Apa nga va zi va ka rovere, nsene mukwawo a tamera mfi, tazi kwendi ta tanta asi: Hewa reta oku mfi zoge ni zi ku tuwire neisi nazi buta. "Nkenye ezuva yelike ngarugana ano nomfi dendi kapi ngadi tuura, kudi siga ngorooro.

Konyima tadi butu. Nsene vakwawo va tamera nomfi dononzi, tava ninki va di vumbike ndi nsene mowato tadi kudumike nzuja asi da ha kukuta. Nomfi dendi kudi siga ngorooro pomutenya noku di tuurasi. Konyima nomfi tadi kukuta tadi butu.

Pokuzi kemo ta gusa nomfi dovakwawo ta di para, tadi tuura tava pe va tware kemo, ano dendi noku di parasi noku di tuurasi ta di simbi ngorooro kemo, dina kukuta di na butu. Ngapi omu nava ka di tereka?

Kambwanga ana kara nye mumatidikantu. Kapi ana hafere hena kurovera ana ya li kutu mokusana yikorama mowiza. Moomu tupu ngazi komukaro novakwawo nomowiza ngosikwawo. Kambwanga mukongo gakere apa nava dipaga vakwawo mpuza, mbambi ndi ndimba tava ninki va yi tuure va gusemo maura noyimpumba asi neisi nayi zonauka. Ano yikoroma eyi ana ku dipaga Kambwanga, ku yi siga ngorooro nayi reta kemo ngwendi lyaKambwanga.

Eyi nava dipaga vakwawo yigwali ndi nonkanga nononkutji ta yi zupu noku yi tuura yipo yi dire kuzonauka. Kambwanga yendi ku yi siga ngorooro tayi lizweke moliva rwendi romombunda. Apa nava sika kembo yigwali neyi nayinye ana ka kongwa yina butu. Morwa pamwe kukara momasuva gavali ndi gatatu. Koyidire yokufa monontenda, yendi ku yi siga ngorooro ano yovakwawo tayi wapaike nava sili unene.

Apa ana ya kuru Kambwanga, ana dike epata, vakwawo vepupi lyendi nawo ngosikwawo.

Mukadendi ndi munwendi ntene a vera, kapi ta mu twara kosihakwiro, kuva siga va verere membo. Ano mukada mukwawo ndi munwa mukwawo ana kuvera, Kambwanga ngapa kagu, tava twara kosihakwiro, makwafo nagenye ngaga gava, vamaarambo vendi ngava mu pandaika noku mu tumbura asi; "Kambwanga -Munankenda", dongoro ngava mu tangauka morusumo asi:

- Kambwanga ngoma za mutovara, Kambwanga'
- Kambwanga ku tuura nkundu gwamukwawo, Kambwanga'
- Kambwanga ku tuura ndimba gwamukwawo, Kambwanga'
- Kambwanga nkundu gwendi tali worere, Kambwanga'
- Kuhakwisa munwa mukwawo, Kambwanga'
- Munwendi tali hepere, Kambwanga'

Vakwetu mokureta esanseko lyaKambwanga, ame kuna hara tu konakoneni ukaro womuntu ogu tuu hetakaneseni nou wetu pazuni wantantani.

Mouzuni ou, ose ava tva pura mwajesus Kristusa, tuna kara moyirugana yokulisigasa mongereka.

a) Nye muzuvisi mepongero lyetu, ogu ani zuvisa kovakriste vakwetu mbudi zongwa, yipo va gwene mpito zokusimba silivi-

ndakano saMuzowoli va mu kwame name nina lifana naKambwanga?

b) Ame mukuronapongero, ogu ani papara mpito zokuzeresasa maudigu govakwetetu. Maudigu gopomapata ame ku ga kohonona, yipo va kare nombili. Apa omu nina likara naKambwanga ngapi?

c) Ame muyevangeliste ndi Mudiakoni. Ame kuhanesa mbudi zongwa nomambo, ame hena kureta vapagani moukriste. Ame kuninka noAndaha momambo nomonomukunda. Kambwanga omu nina likara nendi ngapi?

d) Ame musita, ogu ani korangeda vakriste va kwame nokusikisamo yipango yaKarunga, yipo va ha linapa nendi. Kambwanga name moukaro wetu tva lisiga ndi? Resa mo 1Vakolinte 9:27 nomwaJakopo 1:22-25

Nina diva asi ove muresi mukwetu, ano kara noukontu wa vhura wange, tani ku hundire kesanseko eli ogwederereko magano gamwe.

João Kawali

Kalimbo kaShivolo mo- shipundi shevululuko

Kuku Kalimbo okwa pitile oseminali ponniipa momumvo 1950. Okwa langekwa miilonga poskola Onanona, mOshaango. Poskola mpoka okwa longo po oomvula 30 mundhoka 24 a kala omukuluntuskola. Iilonga ye okwe yi longo nuupenda sigo opehulilo.

"Aalongi yopOnanona omwa ninga oshinima sha simana, nashewe onda hala shi ninge oshiholelwa moosikola adhihe dhomOshitambi. Otandi pandula omalongekidho nomadhiladhilo omawanawa mwe ga ningile ndje. Longeni oshilonga shokuputudha nuupenda!"

Omukuluntusikola Simon Amuthenu, ngoka e mu pingene po muukuluntusikola, pamwe naalongi ye oya longekidha oshituthi oshinene ye mu laleke miilonga noku mu pandula. Oshituthi osha ningilwe eti 2.11.1984.

Aantu ye thike 700, oya li ya gongala moshituthi shika omolwehambelelo lyiilonga yaKalimbo. Oshituthi osha tamekwa nelongelokalunga komusitagongalo S.Shaduka. Konima oshituthi osha tsikile nokukokota omasipa gondumetana ndjoka ya longekidhwa kosikola yo yene, mewiliko lyomukuluntusikola.


Aavali yaanona mboka haya longwa posikola ndjika, oya li ye eta omagano mesiku lyoshituthi. Oondjupa dhomalovu, oontungwa, omatiti nomakaka.

Pethimbo lyetyapulo, kuku Kalimbo okwa popi ta ti:

Simson yaNghiteeka

OWE SHI SHIIVA TUU?

Kutya:




Omunhu nge ta twikile okunwa efimbo lile ota dulu okuninga ombuvi yoikolwifa.

Oukwaalkoholi oo oudjuu nohau li oilyo yomeni lomunhu. Ohau eta oiponga ihapu yolutu. Oiponga imwe yolutu oyo ei:

1. Ehuli tali kukuta: Itali wanifa vali oilonga yalo okuwapaleka ohonde. Ekukuto lehuli, oudu ou ihau hakulwa, nge omunhu ota twikile okunwa ota fi ashike.

Ngenge ehuli itali longo nava, otali tameke okwoongela omaadi. Oudu ou otatu dulu okuhakulwa mo-shipangelo shaa omunhu ta efa okunwa.



Esiku IyaMaria

Dha za kep. 3

omusaseri Sakaria oku li momilema, omolwokwaaitaala. Omilema kombinga yaSakaraia, nokombinga yaMaria na-Elizabeth uyele tau kumitha. Oshinima shika shokuya kwaKalunga muuntu, osha limbilika oyendji. Otaa ti; itashi vulika shi ningwe ngaashi pwa hololwa mOmbimbeli.

Oyendji ya nyengwa okwiitaala notaa ende momilema, notaa nyengwa okuhambelela ehupitho Iya holoka muJesus ngoka Kalunga a ningi onyama omolwehupitho lyetu.

Aanelago oomboka yi itaala ngaashi pwa nyolwa, oshoka shono sha popiwa kOmuwa otashi ka gwanithwa. Omuwa ota ti; "Oshili, Ongame tandi shiti oshinima oshipe, sha tutuma nokuli, inamu shi dhimbulula?" Jes.43:19. Omuwa okwa hala oku tu fala miikwambepo shaa tuu tatu itaale oohapu dhe.

Otu na mpano, ehalo lyOmuwa okulonga iikumitha moomwenyo nomomalutu getu. Oye ote tu udhitha Ombepo Ondjapuki yi kale oonkondo dhetu muuprofeti wongashingeyi. HaMaria awike a pewa ohenda yokuhumbata Jesus Omuhupithi mela Iye, ihe tse otwa pewa ohenda yokutaamba moomwenyo dhetu Jesus dhi kale egumbo Iye. Oto itaale tuu oshili ndjino?

Omuwa ne ku yambeke.

Efraim Angula

Nkene oshilongwa shomusiki tashi vulu okwoopalekwa moosikola dhaanona

Omusiki oyi na sha aluhe noshigwana, oyo oshilongitho shokuholola uunkulungu wopashigwana. Oonkulungu dholwiimbo otaye yi longitha okwiinyanyudha naasama otaa iyambapaleke nayo nokukokitha nayo uuntu wawo.

Omusiki oyo ontopa pokati kepipi nepipi okutaagulukitha omutigululwakalo gwoshigwana muunongo womusiki. Omusiki otayi kwatakaniha aantu kumwe.

Oemukumo gwokunyanyukilwa omusiki noku yi uvako moondunge dhayo, oshi na sha noondunge dhomomutse pamwe nomauvito gomuntu.

Oshike tashi eta uunkundi, opo omusiki yaa longwe moosikola?

Omusindalongo gwomusiki nando opo gu li, oshilongwa, ihashi kala mekonakono. Ishewe ito adha omutaleli te ya ta talele oshilongwa shoka.

Moseminali yuulongi namo wo kamu na nando oshilongwa shomusiki tashi konakonwa.

Pethimbo ndika iigongi yaagundjuka nando tayi tungu pambepo, pamusiki oya kanitha oshindji. Oo TV nooradio nadho odhe tu etela eshunomonima unene momusiki yopashigwana.

Opo aanona yu uve ko omutungilo gwomusiki, otaa pumbwa okutala nokumona shono aantu taa ningi pondje.

Okanona naka longekidhilwe uunongo momusiki yakwalukele mogramatika nomomutungilo gwomatumbulo. Okanona naka uvithwe ko omuthigululwakalo gwoshigwana shako momusiki, opo ki ipendule po pamukalo ngoka.

Ngaka omadhiladhilo gamwe pafupilela ga zi moshipopipiwa shomunamusiki Hilma (Konstantin) Ndiwakalunga, shoka kwa li e shi longekidhile oshigongi shaalongi yoshikandjo oshi-8, omumvo gwa zi ko (1984).

Eyooloko olini pokati komuthiminiki nomutondi?

Moshifo Omukwetu No 22/1984 mepandja eti 9 omwa popiwa omulumentu yo na S.Afrika oyo aatondi yomukiintu. Nomoshifo Omukwetu No. 1/1985, mepandja eti 7 oshitya omutondi osha lundululwa sha tiwa omuthiminiki.

Omuleshi omukwetu, nandi pukululwe. Omulumentu omutondi nenge omuthiminiki ngiini ano?

Ngame mwene onda tala kutya oshitya omutondi nomuthiminiki osha faathana. Omutondi ota vulu oku ku etela oshiponga omlwuutondwe we, nomuthiminiki ota vulu oku ku thiminika sigo e ku etele oshiponga.

Ngame mwene onda tala aantu atuhe mu SWA/Namibia nomu S.Afrika otu na ashike omutondi, omuthiminiki gumwe ngoka e tonde omulumentu nomukiintu wo. Tse aalume-

Tala kep. 10

OSHIGONGI SHAATONATELI YIITAYINGELEKI



Methano ndika okuza kolumoho, Tomas Shivute, amushanga gweputudho lyopakriste ngoka i ithanenwa mo, Matti Amadhila, moshitayi shuuninginino, Simson Ndatipo, komeholela, Asser Lihongo, Kavango nokolumoholela Filippus Shikomba, omukuluntu gwEnongelo mEngela i ithanenwa mo nopokatilela Johannes Shifiona omupeha gwaAmadhila yo naNdatipo.

Pwa piti ngashingeyi konyala omimvo dhi vule omulongo, sho oshigongi shaatonateli yiitayingeleki ine yOngeleki ndjika, naapeha yawo, sha kala hashi gongala.

Iilonga yasho sigo onena kayi li naanaa momaouthompango, ihe okuza kethimbo ndyoka sha kala hashi gongala, osha konekwa, kutya omathaneko gasho melelo lyOngeleki, oge na o-

mwenyo notaga tungu.

Nosho shoka she eta ompumbwe ndjoka shi kale tashi tsikile nokomeho. Iigongi yaasita, Elelongeleki poompito dhimwe noshigongingeleki muule womimvo dha zi ko, oya kala hayi tsakaneke momalandulathano giikundathanwa yayo, omathaneko goshigongi shoka nohashi mwenyeke oonkundathana.

Osho okangundu kaantu mboka ya tseyalela omaupyakadhi gomagongalo.

Hamushanga, puku- lula

Ope na oshinima osho sha holoka moshifo shOmukwetu No.3 pepandja 7. Moshipalanyole "EGWE-DHELO KONDANDO YOMAHOOI," omu na epuko.

Ame hamushanga waNorth Namibia Taxi. (N.N.T) mOwambo, onda hala okuyandja ouye'ele wa wana apa, kombinga yoshipalanyole osho:

Efiku 27.1.1985 oshoongalele shoubesha mOwambo, osha ongalele pofitola oyo hai ufanwa "Ipumbu Restaurant", popepi nOshakati. Osha li sha tokola ngaha kutya:

a) Omahooli okwa wedwa neepeleshenda 25% molitela, onghe nondado otai wedwa.

b) Omitwalo nado otadi futilwa; omitwalo odo deekofa, oipakete yeebiila, oipakete younamunate, oipakete yombelega, noipandi yoikuni. Epuko moshifo oloolo tali ti kutya "oondjato dhopeke otadhi futilwa" osho hasho nande. Eendjato dopeke "outashe", omayayi ounona, inaku tiwa a futilwe nando.

c) Oshoongalele osha tokola kutya okanona ke na eedula 13 nena oke na okufuta etata lomukulunhu. Ounona ve li 2 ve na eedula 13, ova valulwa ongomunhu umwe e yadi noku na okufuta ondado iyadi.

d) Osha yela kutya; ewedelo londado ei, inali xulila apa nande. Oshoongalele eshi otashi twikile nokuweda ondado, shamha tuu omahooli taa wedwa natango, ngaashi mondjila oyo ya finda mOushimba ile neenghono notai eta oudjuu.

Hamushanga omufimanekwa, nghi wete ngenge ope na epuko moshiwana eshi shetu shokumbanganhu ngenge eendado doyeendifo tadi wedwa omolwonghalo yedu letu.

Konyala oubesha vetu mOwambo ou li mo 85 ile nokuli neudo ve dulepo opo. Ndele keshe kamwe oka pewa elandulafano londado yopokati koinano, oyo ya tongwa koshioingalele efiku olo.

Tangi unene kekwafo

Hamushanga wo N.N.T.

OMUTHIMINIKI NENGE

Dha za kep. 9

ntu aathiminiki yoomeme yetu ngiini ano?

Omólwasho omulumentu ha ka tokelwa koondingosho yenomukiintu e li megumbo inaa ka hilamo limwe? Nenge omolwasho inaku ninga omulumentu sho ta ka longa kOshomeya ye omukiintu ta ka konga iilonga kOutjo waNepando, yo aanona megumbo? Nalye? Nenge napu ninge omvula yimwe omukiintu ta ka longa ku-Keetmanshoop ye omulumentu ta kala pegumbo?

P.M.Shaanika

EINDILO LYAKAUNDA KUREAGAN

Omupresidende Kenneth Kaunda gwaZambia okwa ninga eindilo omasiku ga zi ko, kepangelo lyaAmerika opo li hulithe po epulo lyalyo lyAcuba ya ze mo muAngola.

KALUNGA KWATHA NAMIBIA

Omuwa yambeka Namibia
Kalunga kala oshilongo shetu
Shi li momapiyagano ogendji
Moluupika nokatongotongo

Otu li tatu mono iihuna
Moondholongo otatu patelwa
Otatu fikwa nomalusheno
Omuwa yambeka Namibia

Megulu katu shi okulonda mo
Mevi katu shi okuhita mo
Katu shi shoka tu na okuninga
Omuwa yambeka Namibia

Yakwetu yamwe ya ka ninga oondjendi
Ya thiga po oshilongo shawo
Omoluupika mboka u li mo
Omuwa yambeka Namibia

Aamwameme tu galikaneni
Tu indileni twa mana mo
Kalunga e tu uveni
Omuwa yambeka Namibia
J.S.A. Nehunga.

Olutenda muNamibia

Omolutenda agehe ngoka taga longo muNamibia ga kala eliko lya SA, otaga ka gandjwa ku-Namibia okuza mulyotango lyaApilili nuumvo.

Shoka osha tseyithwa omasiku ga zi ko ku dr Willie van Niekerk, Ngoloneya Ndyayi gwa SWA.

Omolutenda agehe ngoka ga kambakana oshilongo, otaku tiwa oge na uule u thike pookilometa 2,150. Nongele ando oga landithwe po niikoto yago, otaku ti, otashi ka pula oobilyona R2,28.

Iilonga yopamalutenda noondjila pethimbo ndika otaku ti otayi kanitha oshindji shopaimaliwa.

Iimaliwa yomalweendo gomomashina nayo oya gwedhelwa omwedhi gwa zi ko muNamibia. Egwedhelo olya faathana naandyoka lya ningwa mu SA.

Egwedhelo lyondando yoshikoto shotango oopelesenda 30% (oshikoto shuuhona) oshikoto oshitiyali oopelesenda 25% noshikoto oshititatu oopelesenda 20%.

Okuza mOvenduka sigo Swakopmund R15-00 moshikoto sha hugunina, R29,50 moshikoto oshitiyali.

Okuza mOvenduka sigo kOkapa R70-00 moshikoto sha hugunina, R141-00 moshikoto oshitiyali na R199-00 moshikoto shotango.

Omaweendo gomoobesa nago oga gwedhelwa R33-00 pokati kaVenduka nOshakati, R41-00 pokati kaShakati naSwakopmund.

Omuleli gwaZambia, eindilo ndyoka okwe li ningila muOslo, oshilandopangelo shaNorwee sho e shi talele po muFebuluali nuumvo.

Kaunda oshilyo shiilongo ihamano muAfrika yi li popepi naAfrika (Frontine States) yi inekelelwa kuukumwe waAfrika (OAU) nokuuyuni omukundu gwevi lyaNamibia.

Pokati mpoka Chester Crocker, amushanga gwiinima yaAfrika mepangelo lyaAmerika, noye i ipyakidhila aluhe noonkundathana pokati ka SA naAngola, oku uvika ta tula natango omuthindo kepulo lyaAcuba ya ze muAngola, Namibia li wape okumanguluka.

Mokugandja ehokololo lye kiilyo yimwe yepangelo sho a galuka kuAfrika pokati kaFebuluali, dr Crocker okwa ti kutya emanguluko lyaNamibia olya kwatwa ashike kAcuba mboka inaa za mo muAngola.

Nonando omusamane ngoka ta hokolola kutya opwa humiwa nawa komeho moonkundathana dhawo nepangelo lyaAngola, onkene tuu ta ti wo, sigo onena kape na etsokumwe momwaalu gwAcuba mboka ye na okuthigala muAngola nehala mpoka ye na okukala.

Pokati mpoka opwa ningwa ethaneko nolyo tali kondjwa nalyo ngele otali wulu okupita. Ethaneko otali ti andola kutya aakwiita yAcuba ngele taa zi mo muAngola, otaye shi ningile oshita naakwiita ya SA mboka ye li muNamibia.

Aakwiita yAcuba muAngola otaa tengenekwa pokati komayovi 25, na 30, manga ya SA muNamibia taa tengenekwa pokati komayovi 15, no 20.

Tala kep. 11

EPULO

Aluhe mpoka aakriste ya gongala, nda dhini okutumbula nando omoshituthi ngaa shontumba, ngele kwa leshwa oohapu, gumwe oha ti: Natu galikaneni.

Omolwashike haku tiwa ngaaka, "tu galikaneni," nando omuntu gumwe awike ta popi?

Oshike ihaaku tiwa owala: Mweneni ndi galikane?

H.T. Concience
EYAMUKULO

Egalikano lyomongundu kali shi ashike iitya, ihe olyo eimweneneno koshipala shaKalunga. Nando gumwe ta tumbula sha niitya, ayehe oye li kumwe notaa galikana pamwe nokulandula mokutya: "Ameni" kutya natse wo osho twi indile shoka.

Mokumwena megalikano, atuhe otwa hala wo okupulakena shoka. Kalunga ta ti kutse atuhe. Nokuli egalikano olyo oshinima shomomwenyo.

Ompito yegalikano ohayi tu pe ashike atuhe tu galikane nando haniitya yu uvitikwe, ihe omoomwenyo dhetu ndhoka dha mangwa kumwe mombepo yaKalunga pethimbo lyegalikano.

Festus Ashipala

Dha za kep. 10

Epangelo lya SA olya thaneka ando Aacuba 30,000 ya kale ya shuna kaandjawa muule woomwedhi ndatu niihupe mbyoka ya thigala mo 1,500 yi shune muule woomwedhi ne manga aakwiita ye inaa pwa mo muNamibia.

Ihe kombinga yaakwiita ye muNamibia SA okwa thaneka ya shune ayehe, muule woomwedhi ndatu e ta mu thigala ashike 1,500 mboka taa ka pwa mo konima yoomwedhi hejali.

Ethaneko lyepangelo lyaAngola oli ili inali tsa kumwe naandyoka lyepangelo lya SA. Epangelo lyaAngola otali thaneke andola elandulathano molwemanguluko lyaNamibia li ende ngeyi:

Aacuba yalwe ngele ya shuna, moshilongo otamu thigala natango omayovi 5,000 nenge nokuli 10,000. Ihe mboka otaa kala kokule ookilometa 1,600 okuza pongamba yaNamibia.

MuAmerika ombili otayi kana molwaNamibia

Onkundana ndjoka ya holoka moshifonkundana shOngeleki onkwaevangeli paLuther muAmerika "News Bureau 85-7", otayi tamaneka omulandu gwaAmerika okweenditha kwe iinima yaAfrika.

Oshifo osha ti omulandu gwepangelo lyomupresidende Reagan, ngoka e gu luka aniwa "Ekwatathano tali tungu", ogwa ndopa mokweeta po elunduluko ewanawa mepangelo lya SA.

Onkambadhala yepangelo lyaAmerika muule woomvula ne dha zi ko, okuziminitha epangelo lya SA li ete po elunduluko lya tegelelwa kuuyuni, unene moshinima shaNamibia, oya tamanekwa wo omasiku ngaka nokungoka a li nale omukalelipo gwepangelo ndyoka ku VVO, dr Donald McHenry.

Omusamane McHenry ogwongundu yompilameno mepangelo lyaReagan nokwa kala shito gumwe gwoonakwiinekelelwa oonkundathana dhemanguluko lyaNamibia pethimbo ongundu yawo "Democratic Party", oyo yi li koshipundi.

Pamwe niilyo yewiliko lyongundu yawo, otaa holola oluhodhi lwawo mokutala omukalo ngoka ongundu ndjoka yi li koshipundi nkee tayi enditha oshinima shaNamibia.

Okushunitha Aacuba ya ze muAngola osho oshinima shotango tashi lalakanenwa kepangelo lyaAmerika nopatiyali olya hala okumona epangelo lyaAngola lya lundulula omulandu gwalyo gwongashingeyi, opo ihe aniwa monkatu ontitatu, Amerika opo te ya moshinima shemanguluko lyaNamibia, osho McHenry te shi fatulula ngaaka.

Okwa gwedha ko ihe kutya, omulandu gwa tya ngeyi, otagu koleke ashike Aacuba ya tsikile okukala muAngola.

Omusamane Chester Crocker sho kwa li ta kambadhala okupopila epangelo lyawo, nokwiikutha oshinima shaAcuba, kutya aniwa Amerika haye tango e shi pula, ihe o SA, okwa shunwa ko. mbala kuyakwawo, kutya shoka iifundja.

"Ethaneko olye etwa tango kepangelo lyaReagan, Aacuba ya kwatakanithwe

nemanguluko lyaNamibia, ye SA e te li koleke", osho aapolotika muAmerika ye shi fatulula ngaaka.

Dr. Crocker naye okwe shi hempulula puuyelee kutya epangelo lyawo, nalyo wo inali shi tala shi li nawa okutala Namibia li li natango moonyala dha SA, nokwa tsikile ko, a ti:

"Ashike otatu kambadhala ngaa tu patukunune omikundu ndhoka dhi li po nokupula wo onduge kumboka taye tu tamaneka ye tu lombwele wo shono tu na okuninga."

MuAmerika omu na yamwe ye na naanaa omadhiladhilo ga fa gaantu yamwe muNamibia, kutya epangelo lyaReagan olya fala kokule epangelo lya SA mokutokelitha emanguluko lyaNamibia.

Dr. McHenry ote shi holola ngeyi, kutya omusamane Reagan sho a yi koshipundi, opo wo pethimbo ndyoka SA a tameke nokuninga iiponokela muAngola mbyoka ihaayi pangulwa we kepangelo lyaAmerika.

70 ya kwatwa

Okwaauva ombili mokati kaAjamerika omolwomulandu gwa SA gwokatongotongo, okwa falitha mekwato lyaantu 70 moshilongo shoka. Pauyelee woshifo "New Bureau 85-10, aasita naawiliki yomahangano galwe, unene ngoka ge na sha nuuyuuiki womonkalathano yaantu, oya li mongundu ndjoka.

Pokati kaFebuluali nuumvo, ongundu yaakriste unene Aakwaluther, oya li ya tokola okuulika okwaauva ombili kwawo kegumbo lyaakalelipo yepangelo lya SA, muWashington, omolwokatongotongo.

Mondjila embamba lyaapolosi olye ya nolye ya toola po ayehe aalumentu 48 naakiintu 22 noya falwa kombelewa. Pethimbo taa mangwa kaapolosi, yo otaa imbi "**Kalunga oye egameno, Matati wo negonga**" - Eimbilo lyaAakwaluther ndyoka lya thigululwa kuMartin Luther.

Ehokololo olya ti kutya siku ndyoka aahololi yokwaauva ombili moshinima shoka, oya monikile taa inyenge pomatungo ngoka gaakalelipo ya SA ye thike 250. Momapakete gawo omwa li mwa shangwa, "Emanguluko olyo alike, okatongotongo, aawe." Oshifo osha ti kutya shoka osha kala iwiike niwiike tashi tsikile.

Aahololi yomadhiladhilo kaya li ashike taa tamaneka omulandu gwokatongotongo netindo lya SA okutulitha oshitokolitho 435 sha VVO miilonga, ihe oya li wo taa kondjitha omulandu gwepangelo lyaReagan ngoka gwa lukwa "Ekwatathano tali tungu," muumbugantu waAfrika.

Oye shi holola mehokololo lyawo kutya omulandu ngoka ogwa "ndopa" naanaa okuhanagula po okatongotongo.

"Tse otwe shi itaala ngaashi hatu shi longo nohatu shi hempulula, kutya Jesus Kristus okwa si nokwa yumuka opo a sinde okatongotongo pokati komuntu naKalunga nopokati komuntu nomuntu o mukwawo. Kristus ota mangulula nota hanganitha,"

Osho sha li tashi leshwa momusha-

ngwahokololo gwawo ngoka gwa gandjwa mombelewa yomukalelipo gwa SA muAmerika siku ndyoka.

Okukondjitha okatongotongo mu SA nokupula epangelo lya SA li hulithé po mbala omathiminiko mokati kaAaluudhe noli gandje mbala emanguluko lyaNamibia, osha li sha popilwa nokaambisofi yoOngeleki ndatu oonene onkwaLuther moshilongo shoka.

Ehokololo lyaambisofi mboka, ndyoka tali yambidhidha okwaauva ombili kwiilyo yomagongalo gawo, nalyo wo olya leshwa mpoka montaneho koshipala shiilyo yepangelo lya SA.

Oongelesi ookwaLuther ndatu muAmerika, odhi li melongekidho lyokuhengumukila mumwe omumvo 1988. Odho, ongeleki onkwaLuther muAmerika, mewiliko lyomumbisofi James R. Crumley Jr., Ehangano lyoongelesi ookwaevangeli paLuther mewiliko lyomumbisofi Will L. Henzfeld, nongelesi onkwaLuther yaAjamerika mewiliko lyomumbisofi David W. Preus.

Aambisofi mboka pakuuva nayo wo oya halele okukala mosheendo shaahololi yomadhiladhilo siku ndyoka, mupya munene, esiku olya tsakanene noshigongi shokomisi yokulongekidha ehengumukilo mumwe lyoongelesi.

Oshipotha shoongwatwa ndhoka 70, osha ekelwahi ashike, nopauyelee womusamane Martin Sövik, omuwiliki omupeha mombelewa yaAakwaluther muWashington, ndjoka yi na sha niinima yepangelo, ota ti, kutya shoka osha fa sha ningwa nowina.

Elunduluko lyonkalo oshinima sha pumbiwa noonkondo, manga okutokelwa nokwoopaleka iinima, otashi dhigupaleke ashike elunduluko lyopambili, osho sha leshwa momushangwahokololo gwaambisofi.

Sho ya hempulula montaneho nkene yo taa tsu kumwe nomadhiladhilo gaahololi yokwaauva ombili, oyu ulumike epangelo lyawo li gwedhele onkondo mokuthiminika SA opo a tule oshitokolitho 435 miilonga.

Ongeleki okwaLuther muAmerika inayi kala shito kokule neuvitopamwe lyiigwana yomuNamibia mekonjelomanguluko lyayo.

Poompito odhindji oombilive dhomahekeleko netso. lyomukumo dha zi kuyo odha leshwa miiningwanima yoshilongo shika.

Shoka ashike osha li onkambadhala yopaumwene nenge yomuwike. Pethimbo ndika Ongeleki oya kutha ompadhi yi ka popye nepangelo lyayo opo li ninge ashike tali vulu, okupopitha epangelo lya SA li gandje emanguluko kiigwana yaNamibia noli hulithapo okatongotongo miigwana ya SA.

Sho yi indile tango onkwatwa dhopolotika dhi vule 30 dha kwatwa nuumvo muNamibia dhi mangululwe mo, aahololi yomadhiladhilo mboka oya ti:

"Tse otwa gongalela mpaka, tu li mombepo yaAakwaluther, tu ninge notu hokolole ehokololo pashiholelwa shono Luther e shi tula po."

Esiku ndyoka olya pewa edhina muAmerika "**Esiku lyehokololo lyaAakwaluther.**"

Sebulon Ekandjo

ESIKU LYUUNAFALAMA WOONGOMBE MONANDJOKWE

—13.4.1985



- Ipopiwa oya pamba uunafaalama wiimuna.
- Elanditho lyiikulya, omiti, niilongitho yilwe.
- Elandithopo lyoongombe.

ETHIMBO: 9.00 gwongula
Ila u italele ko!

Eshakeno lomaitavelo mounyuni nali kongelwe onhele muIndia

Oshoongalele shotete sheshakeno pokati komaitavelo e lili noku lili mounyuni ou, osha ningilwe muMadras, India petameko laJanuali

1985 nosha faneka onhele ei, i kale alushe yomashakeneno.

Ovawiliki 60 va dja momaitavelo e lili noku lili moilongo i lili noku lili, okwa li va ongalela mo.

Ouwa wonhele oyo owa monikile vati eshi monhele oyo tamu hangika omaitavelo mahapu

ovakriste, Ovaislam, Ovabuddha nOvahindu.

Elalakano leshakeno, otaku tiwa okulihongafana nokupaafana eewino da pumbiwa moimima yomaiatvelo.



TYRE CENTRE, ONDANGWA,

BOX 237, TEL. 21

— OTATU UKILILITHA OMAGULU GOSHIHAUTO SHOYE.

— WE HELP YOU WITH TYRES BALANCING SERVICE.

— ONS BEDIEN U MET BANDE BALLANSE-RING DIENS.

MARIO CARVALHO (Omutseyithi / Sales Director / Verkoopsdirekteur)

OMBILI NAYI GALIKANE-NWE

Onda hala tu galikaneneni iita moshilongo shetu yi hule po, ondjala, uuvu nuushiinda u kale u na ombili nelandulathano.

Tangi sho tatu longeleni pamwe pambepo nando omalutu ga topoka.
L.S. Nambombola
Ogongo.

OMUKWETU

Oye oshifo shOngeleki Onkwaevangeli paLuther yomOwambokavango.

Ohashi nyanyangidhwa mOshinyanyangidho shOngeleki mOnilpa.

Omukuluntu gwoshifo omumbisofi. Dr. Kleopas Dumeni,
Amushanga gwoshifo omusita Sebulon Ekandjo

Ondando yOmukwetu muNamibia naSuid-Afrika R 5,00 komumvo.

Palwe muAfrika R 8,00 nokombanda yomafuta 11,00, komumvo. Mondhila R 13,00.

Oondando nomambestelo agehe naga tumwe kOmukwetu, Onilpa, P.Bag 2013, Ondangwa, 9000

EV. LUTH. OWAMBOKAVANGO CHURCH PRESS
PRIVATE BAG 2013, ONDANGWA 9000
SWA/NAMIBIA